

Inatsisartut suleriaasianni § 37 naapertorlugu Naalakkersuisunut apeqqutit matumuuna saqqummi-uppakka:

**Apeqqutit:**

- 1. Nunalerinermut allaffissornikkut qitiusumik allattoqarfik nunap immikkoortuanut sumiiffimmi nunaleriffiusumut nuunneqarnissaannik pilersaaruteqartoqarpa?**
- 2. Ukiuni tulluuttuni savaateqarfiit ikiliartornerisa kingunerisaannik savaaqqat tunisassiarineqartussat ikilinnissat naatsorsuutigineqarpoq. Tamanna qanoq immikkut ittumik iliuuseqarfigissallugu Naalakkersuisunit pilersaaruteqartoqarpa?**
- 3. Naggorissaatit avataanit tikisinneqartartut sunik akoqarneri ilisimaneqarsimassamata avatangiisinullu sunniutigisinnaasaat suuppat?**

(Inatsisartuni ilaasortaq Vivian Motzfeldt, Siumut)

**Tunngavilersuut:**

Nunalerisut qanimut tikillugit sullissineq qangali siunnerfigineqarusullunilu pilersaarutigineqartarmat pissusissamisoortutullu isumaqarfiginarmat, ersarissumik Naalakkersuisut tungaanniit allaffissornerup sumiiffimmut nunaleriffiusumut nuunneqarsinnaanerani pilersaaruteqartoqarnerisooq paaserusunnarpoq.

Nunatsinni imminut pilersornerup qaffassartuarneqarnissaannut savat savaaqqallu neqaannik tunisassiorneq annertuumik tunngaviliisunuttaaq ilaapput. Ukiunili qaninnerni savaaqqat savaatillilu ikiliartornerisa takutippaat immikkut nunaateqarnerup tungaatigut iliuuseqartoqartariaqarneranik. Politikkikkut anguniakkanut naapertuuttumik ingerlasoqassappat paaserusunnarpoq immikkut ittumik iliuuseqarnissami, Nunalerinerlu pillugu ataatsimiititaliarsuup inassuteqaataasa piviusunngortinneqarnissaanni Naalakkersuisut qanoq pilersaaruteqarnerisut.

Avatangiisinut innarliinnginnissaq annertoorujussuarmik politikkikkut oqallisigisarparput pingaartitaralugulu. Ilisimavarput nunani allani naggorissaatit atorineqartartut ilaasa annertuumik avatangiisinut mingutsitsisinnaasarneri. Taamaammat paaserusunnarpoq naggorissaatit Nunatsinnut tikisinneqartartut sunik akoqarnerisut aammalu avatangiisinut qanoq sunniuteqartitsisarnerisut.

Apeqquteqaatima ullut qulit suliffiusut iluanni akineqarnissat kissaatigaara.